



22. januar 2015

UPA 2015/109

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Akilerartarnermut Oqartussaasut ataanni immikkoortortaqaarfimmik immikkut suliaqartussamik, aningaasaqarnikkut pinerluuteqartarnerup, ilaatigut ikiaroonartunik niuerniarnermut attuumassuteqartup, paasineqarnissaanik siunertaqartussamik pilersitseqqullugit Naalackersuisut peqquneqarnissaanik siunnersuut, tamanna pissaq akileraarusersuinerimi annertunerusumik suliniuteqarneq aqqutigalugu, tamatumunnga ilanngullugit nalunaarsuiffiit atortorissaarutillu pioreersut ataatsimoortinnerat, tassuunakkut isertitat pigisallu nalillit inatsisinik unioqqutitsilluni pissarsiaasimasut paasineqarsinnaaqqullugit.** (Inatsisartunut ilaasortaq Agathe Fontain, Inuit Ataqatigiit)

### Tungavilersuut

Ukiuni kingulliunerusuni apeqqutigineqartarpoq aningaasaqarnikkut pinerluuteqartarnermut hash-imut attuumassuteqartumut naleqqiullugu akileraaruserinermi annertunerusumik suliniuteqarnissap unamminartut suut nassatariumaarnerai. Naalackersuisut ilisimatitsissutigaaat taamatut suliniuteqarnissaq iluatsilluassappat atortorissaarutunik inerisaanissaq annertoq pisariaqassasoq, suliaqarfiit assigiinngitsut paasissutissaataat ataatsimoortinneqarsinnaalissappata. Kingullermik § 37 naapertorlugu apeqquteqaateqarlunga Naalackersuisut qinnuigaakka, atortorissaarutunik inerisaanissaq pineqartoq piviusunnussappat, nukissatigut sillimmatit suut atorineqartariaqassanersut ilisimatitsissutigeqqullugu. Kisianni Naalackersuisut akissutaat tamatuma erseqqissarnissaanut annerusumik iluaqutaanngillat.

Akerlianik Naalackersuisut ilisimatitsissutigaaat politiit isumaqarunik Namminersorlutik Oqartussat pineqartumut aningaasaliinerusariaqartut ilisimatitsinissaat ilimagineqartoq. Naalackersuisut taamaalillutik pingaartippaat ikiaroonartunik nioqquteqarneq akiorniarlugu suliniuteqarneq sallerpaatillugu politiit suliniuteqarnerisigut pisariaqartoq, maannalu politiit akilerartarnermilu oqartussaasut suleqatigiinnerat ingerlalluareersoq. Siunnersuut maanna aqqutigalugu suleqatigiinnerup pioreersup pitsaassusaa apeqquserniangilara.

Kisianni isumaqarpunga uagut inatsisiliortutut annertunerusumik sulissutigisariaqaripput, ilisimasat sakkullu Akilerartarnermut Oqartussaasut pigeriigaasa sunniuteqarnerunissaat anguniarlugu atortorissaarummik pilersitsinissaq, taamatullu Akilerartarnermut Oqartussaasut suliasap tamatuma pingaartinnerulernissaanut nukissanik tunineqarnissaat sulissutigisariaqaripput.

Taamaalilluni aalajangiiffigisassatut siunnersuut manna aqqutigalugu kissaatigisara tassaavoq, akileraarusersuinnikkut annertunerusumik suliniuteqarneq aqqutigalugu, Akilerartarnermut Oqartussaasut ataanni siunertaq naapertorlugu immikkut

immikkoortorta qarfiliornikkut, sakkussallu pisariaqartut atorlugit, Akileraartarnermut Oqartussaasut politiillu suleqatiginnerat pioreersoq annertusarneqassasoq.

Siullermik akileraarusersuinikkut suliniutit annertusarnerisugut politiit suleqatiginnerat pioreersoq pitsannngorsarneqassaaq, tassami ilimagisariaqarmat akileraartarnermut oqartussaasuni immikkut sulialimmik immikkoortorta qarfik politiit saaffiginnissutaannut sukkanerusumik qisuariarsinnaassuseqassasoq.

Aappaattut ilimagivara, akileraartarnermut oqartussaasuni immikkut immikkoortorta qarfimmit misissuinissat aallarnisartarnissaat aallunneqarnerussasoq, maanna pissusiusut akerliannik, tassami maanna imaappasippoq politiit tassaannerusut suliniutinik aallartitsisuusartut.

### **Pisortani aningaasaqarnikkut allaffissornikkullu kingunerisassa**

Siunnersuut maannatut isikkoqarluni akuersissutigineqassaguni, pisortanut aningaasaqarnikkut allaffissornikkullu toqqaannartumik kinguneqassaaq. Siullermik qulaajarneqartariaqarpoq, atortorissaarutitsigut inerisaaneq oqaatigineqartoq piviusunngortinneqassappat nukissatigut sillimmatit suut pisariaqassanersut. Oqaatigineqareersutut tamanna Naalackersuisut nalorninaatsumik paasisutis-siissutigisinnaasimangilaat, kisianni eqqoriarpara piareersaneq minnerpaamik AC-p ataatsip ukioq ataaseq suliaatut naleqassasoq. Kingusinnerusukkut akileraartarnermut oqartussaasuni immikkut ittumik immikkoortorta qarfiliorortoqarpat, ingerlatsinermi minnerpaamik AC-p ataatsip ukioq ataaseq sulinera pisariaqartinneqassasoq eqqoriarneqarsinnaavoq.

Ilimanarsinnaavoq Akileraartarnermut Aqutsisoqarfiup suliassat sularineqartarnerannik aqqissuusseqqinnermigut aningaasatigut sinaakkutit pioreersut iluanni siunnersuut piviusunngortissinnaagaat. Kisianni isumaqarpunga uagut inatsisiliortutut nassuerutigisariaqarippat, kissaatigigutsigu Akileraartarnermut Aqutsisoqarfiup suliassaq tigussappagu, aqutsisoqarfiup suliaanut allanut sunniuteqarnerlunngitsumik, minnerunngitsumik ingerlatsinermi salliutitsisariaqassalluta Aningaasanut Inatsit aqqutigalugu amerlanernik aningaasaliissuteqarnitsigut.

### **Namminersorlutik inuussutissarsiortunut aningaasaqarnikkut allaffissornikkullu kingunerisassa**

Siunnersuutip namminersorlutik inuussutissarsiortunut aningaasaqarnikkut allaffis-sornikkullu kinguneqarnissaa ilimagineqanngilaq.

### **Innuttaasunut aningaasaqarnikkut allaffissornikkullu kingunerisassa**

Siunnersuutip innuttaasunut aningaasaqarnikkut allaffissornikkullu kinguneqarnissaa ilimagineqanngilaq.